

Celebracion di Dia di Tera na Dep. Arubiana Caribiana

Santa Rosa y Biblioteca lo realisa hunto e di IV Green Education Symposium

ORANJESTAD – Pa prome biaha, Biblioteca Nacional Aruba (BNA) a celebra Dia Internacional di Tera, conhuntamente cu departamento di Agricultura, Cria y Pesca (Santa Rosa). Directora di BNA sra. Astrid Britten a elogia e iniciativa cu Santa Rosa pa conhuntamente cu BNA duna contenido na e celebracion aki.

Tabatin tentnan cu variedad di producto herbal y vegetariano uza como remedi y gastronomia. Tambe Santa Rosa tabatin su propio tent pa suministra informacion general. Ademá tabatin un charla duna pa sra. Olinda Rasmijn di fundacion StimAruba riba importancia di nos mangelnan.

Biblioteca

Sra. Britten kende tabata presente den e actividad aki a bisa cu nan a dicidi di realisa e actividad aki den e sede di Arubiana Caribiana, ya cu e departamento aki a wordo crea específicamente pa salvaguardia nos herencia cultural y duna informacion riba nos naturalesa.

Como acto simbolico di Dia Internacional di Tera tabatin e plantamento di un mata di Merengue den e cura di e departamento Arubiana Caribiana di BNA. El a bisa cu e cura ta basta grandi y tin mas mata cu lo wordo planta pa despues nan por ricibi e beneficianan di nan. “No solamente cu nan ta duna sombra pero específicamente di e mata di Merengue cu ta e Moringa cu ta masha hopi uza mes”, el

a bisa.

Simposio

Empleado di BNA, sr. Ronny Alders kende ta organisado e di IV Green Education Symposium a bisa cu e dia dedica na mama tera mester haci nos mas consciente di e importancia di cuida nos tera. “Nos ta biba di tera”, el a bisa.

E ta haya cu nos hendenan a bira mas consciente riba importancia di cuida nos tera. “Pasobra si nos dañ’e ta nos futuro generacion mes ta paga e consecuencia”, el a declara na Bon Dia Aruba.

El a anuncia cu Santa Rosa y Biblioteca Nacional como dos departamento di gobierno a uni forsa pa organisa e di IV Green Education Symposium pa studiantenan di scol secundario y universidad. E simposio aki ta pa conscien-



tisa nos hobennan riba importancia di agricultura sostenibel.

E simposio educativo aki lo tuma luga na luna di september na Biblioteca Nacional Aruba. Nan lo sigui informanos comunidad riba e actividad aki. □